

摘藻堂四庫全書薈要

史部

欽定四庫全書薈要卷六千三百十四

金史卷七十二

元中書右丞相總裁托克托等修

列傳第十

羅索

和尼

默音

仲

本名實古納

哈里

尼楚赫

古雲

本名達蘭

瑪奇

子烏色

巴爾斯

實古納

羅索字幹里延完顏部人年二十一代父布達為七水諸部長太祖克寧江州使羅索招諭係遼籍女直降伊騰伊罕路達哈藩昭蘇等敗遼兵于布爾罕山復敗遼兵擒兩將軍既而伊克尼瑪蘭兩路皆降進兵咸州克之諸部相繼來降獲遼北女直係籍之戶遼都統耶律鄂爾多以二十餘萬衆來戍邊太祖趨達嚕噶城次寧江州西召羅索羅索見上于軍中上見羅索馬多疲乏以三百給之使隸左翼宗翰軍與尼楚赫縱兵衝其中

堅凡九陷陣皆力戰而出復與尼楚赫戍邊及九百奚營等部來降則與尼楚赫攻黃龍府上使完顏琿楚博勒和實古納以兵四千助之敗遼兵萬餘于白馬樂宗雄等下金山縣使羅索分兵二千招沿山逃散之人耶律聶哱軍蒺藜山烏楞古羅索等破之遂取顯州太祖取黃龍府羅索請曰黃龍一都會且僻遠苟有變則鄰郡相扇而起請以所部屯守太祖然之仍合諸路穆昆命羅索為萬戶守黃龍府進都統從杲取中京與希尹

等襲走達魯和尚伊勒希等敗奚王錫默降奚部西節
度額哩埒遼主自駕鶻深西走羅索等追至白水灤獲
其內庫寶物羅索遂與棟摩攻破西京復與棟摩至天
德雲內寧邊東勝其官吏皆降獲阿蘇夏人救遼兵次
天德羅索使托紐布當以騎二百為候兵夏人敗之幾
盡額圖琿復以二百騎往遇伏兵獨額圖琿脫歸時久
雨諸將欲且休息羅索曰彼再破吾騎兵我若不復往
彼將以我怯即來攻我矣乃選千騎與實實把爾斯往

幹魯壯其言從之羅索遲明出陵野嶺留巴爾斯以兵二百據險守之獲生口問之其帥李良輔也將至野登高望之夏人恃衆而不整方濟水為陣乃使人報幹魯羅索分軍為二迭出迭入進退轉戰三十里過宜水幹魯軍亦至合擊敗之遼都統達實犯奉聖州壁龍門東二十五里羅索卓哩馬和尚等以兵取之生獲達實其衆遂降遼必埒哩守奉聖州棄城遁去後與宗望追遼帝羅索芬徹以二十騎候敵敗其軍三千人于三山有

千人將趨奉聖州芬微復敗之擒其主帥而還夏人屯兵於哈屯館宗翰遣羅索戍朔州築城於霸德山西南二十里遂破朔州西山兵二萬擒其帥趙公直其後復襲遼帝于伊都谷獲之賜鐵券惟死罪乃答之餘罪不問尼楚赫圍太原宗統制劉臻救太原率衆十萬出壽陽羅索擊破之繼敗宋兵數千於榆次宋張灝軍出汾州巴爾斯擊走之灝復營文水羅索及托克索巴爾斯與戰灝大敗宗翰定太原羅索取汾石二州及其屬縣

溫泉方山離石芬徹降壽陽取平定軍及樂平復招降遼州及榆社遼山和順諸縣宗翰趨汴州使羅索等自平陽道先趨河南曰若至澤州與色哩博勒和實實遇當與俱進實實之前軍薩木哈敗宋兵三千于襄垣遇伏兵二千又敗之薩喇達破天井關復破步兵於孔子廟南遂降河陽羅索軍至既渡河遂薄西京城申兵來拒戰實實逆擊敗之西京降羅索取偃師永安軍鞏縣降薩喇達敗宋兵於汜水於是滎陽滎澤鄭州中牟相

次皆降宗翰已與宗望會軍于汴使羅索率師趨陝津
攻河東郡縣之未下者烏爾圖罕敗敵于河上桑阿敗
敵于陝城下呼沙呼降號州守裨卒三百人遂克陝府
實古納桑袞破陝之散卒于平陸西北和尼別破敵於
平陸羅索破蒲解之軍二萬盡覆之安邑解州皆降遂
克河中府降絳慈隰石等州宗翰往洛陽使羅索取陝
西敗宋將范致虛軍下同華二州克京兆府獲宋制置
使傅亮遂克鳳翔阿林等破宋大兵于河中幹魯破宋

劉光烈軍於馮翊額特埒桑衮敗敵於渭水遂取下邦
宗翰會宗輔伐康王命羅索芬徹專事陝西以博勒和
勝額監戰勝額等遇敵於蒲城及同州皆破之羅索芬
徹克丹州破臨真進克延安府遂降綏德軍及靜邊懷
遠等城寨十六復破青澗城宋安撫使折可求以麟府
豐三州及堡寨九降于羅索晉寧所部九寨皆降而晉
寧軍久不下羅索欲去之色哩不可曰此與夏鄰且生
他變城中無井日取河水以為飲乃決渠于東泄其水

城中遂困李位石乙啓郭門降諸將率兵入城守將徐徽言據子城戰三日衆潰徽言出奔獲之使之拜不聽臨之以兵不為動紩之軍中使先降者諭之使降徽言大罵與統制孫昂皆不屈乃并殺之遂降定安堡渭平寨及鄜坊二州於是羅索博勒和守延安折可求屯綏德芬徽還守蒲州延安鄜坊州皆殘破人民存者無幾羅索置官府輯安之別將鄂倫降建昌軍京兆府叛羅索復討平之遂與阿里布穆里延至三原額克沁阿古

擊淳化兵敗之羅索乃攻乾州已築甬道列礮具而州

降遂進兵克邠州軍于京兆陝西城邑已降定者輒復

叛於是睿宗以右副元帥總陝西征伐時羅索已有疾

睿宗與張浚戰于富平宗弼左翼軍已却羅索以右翼

力戰軍勢復振張浚軍遂敗睿宗曰力疾鏖戰以徇王

事遂破巨敵雖古名將何以加也以所用犀玉金銀器

及甲冑并馬七匹與之天會八年薨十三年贈泰寧軍

節度使兼侍中加太子太師皇統元年贈開府儀同三

司追封莘王以正隆例改贈金源郡王配享太宗廟庭
諡莊義子和尼默音實古納

和尼年十七從攻寧江州力戰創甚扶出陣間太祖憑
高望見問之知是羅索子親撫慰賜藥歎曰此兒他日
必為名將其攻濟州敗敵八千與敵遇于信州伊喇本
陷于陣和尼力戰出之敵遂北敗耶律佛德等兵于瀋
州及宗翰以兵襲奚王錫默和尼以兵三百敗敵二千
從攻伊實部敗之破其二營塔喇部族叛率二穆昆突

入大破之和尼常從羅索圍太原宋將种師中以兵十萬來援和尼擊敗之大軍至河無船不得渡羅索遣和尼循水上下和尼率軍三百自孟津而下度其可渡遂引軍以濟大軍於是皆繼之宋將郭京出兵數萬趨羅索營和尼從旁奮擊敵亂遂破之師還破敵於平陸渡得其船以濟又以兵破敵於張店原時屯留太平翼城皆有重敵竝破之又分兵取陝西蒲州降留和尼鎮之攻鳳翔和尼先登睿宗定陝西和尼為都統進攻涇州

敗其兵王開山以兵拒歸路邀戰再擊再敗之遂降京
兆鳳翔諸縣羅索薨襲哈濟明安代為黃龍府路萬戶
天眷三年為元帥右都監遷左監軍元帥府罷改安化
軍節度使歷京兆尹封廣平郡王以正隆例改封代國
公進封隋國公諡貞濟卒年六十一

默音勇力過人善用長矛突戰天眷間充牌印祗候授
顯武將軍擢符寶郎皇統四年其兄和尼襲濟州路萬
戶以親管沃濟明安讓默音朝廷從之權濟州路萬戶

八年為元帥右都監天德三年為順天軍節度使歷河間臨潢尹數月改博索路兵馬都總管薩巴反默音往討之是時世宗為東京留守自將討爪里還遇默音于常安縣盡以甲士付之世宗還東京完顏福壽高忠建率所部南征軍亡歸東京默音亦率其衆來附即以臣禮上謁遂殺高存福李彥隆等默音福壽忠建及諸將吏民勸進世宗即位拜右副元帥都統白彥敬副統赫舍哩志寧在北京拒不受命默音伐之遇其衆于建州

之境皆不肯戰彥敬志寧遂降二年正月默音率諸軍討斡罕會兵於濟州合甲士萬三千人過泰州至珠格崖乃捨輜重持數日糧輕騎追之是時斡罕新敗于泰州將走濟州默音兵至長灤南獲其謀者知敵將由別路邀糧運遂分軍往迎敵吏吉勒扎來降默音用其計因夜亟往邀敵輜重忽大風不能燧火路暗莫相辨比曉纔行三十餘里將至敵營將士少憊默音率善射者數十騎往覘之而都統志寧克寧等已敗敵衆二萬餘

於長樂追殺甚衆敵遂西遁志寧軍先追及於霧霖河
急擊敗之而默音貪鹵掠不復追以故敵得縱去遂涉
懿州界陷靈山同昌惠和等縣窺取北京西攻三韓縣
惟克寧軍追躡默音託馬弱引還懿州上聞之下詔切
責默音以布薩忠義為右副元帥代之赫舍哩志寧為
右監軍代完顏福壽而默音子色克暴橫軍中詔勒歸
本貫默音至京師以為同判太宗正事世宗責之曰朕
以汝為將汝不追賊當正汝罪以汝父羅索有大功特

免汝死汝雖非宗室而授此職汝其勉之未幾率賓路
軍士珠勒呼告色克寄書與默音謀反有司并上其書
世宗察其誣詔鞠告者珠勒呼款伏遂誅之召默音謂
之曰人有告卿子為反謀者朕知卿必不為此今告者
果自服罪宜悉此意初斡罕方熾上使溫特赫阿魯岱
守古北口及斡罕敗于陷泉入于奚中率諸奚攻古北
口阿魯岱因其妻生日輒離軍六十里賊衆聞之來襲
殺傷士卒甚衆阿魯岱坐除名詔默音芬徹烏哩頁富

察通以兵三千會舊屯兵擊之擒賊黨明安和卓未幾
幹罕平乃還七年出為北京留守上御便殿賜食及御
服衣帶佩刀謂之曰以卿故老欲以均勞逸故授此職
卿其勉之改東京留守封榮國公大定十一年薨年六
十四默音性忠厚善擊毬射獵時論以為雖智略不及
其父而勇敢肖之云

仲本名實古納體貌魁偉通女直契丹漢字其兄幹魯
為統軍愛仲才欲使通吏事每視事常在左右遇事輒

問之應對如響韓魯歎曰此子必為令器皇統初充護
衛授世襲穆昆天德元年攝其兄和尼濟州萬戶部內
稱治除濱州刺史以母憂去官起復知積石軍事轉同
知河南尹正隆六年伐宋為神勇軍副都總管與大軍
北還除同知大興尹將兵二千並遵化屯軍備契丹還
西南路招討使兼天德軍節度使政尚忠信決獄公平
番部不敢寇邊召為左副都點檢宿衛嚴謹每事有規
矩後來者守其法莫能易也世宗常謂侍臣曰實古納

入直朕寢益安五年宋人請和為姪國不稱臣仲為報
問使仲請與宋主相見禮儀世宗曰宋主親起立接書
則授之乃至宋一一如禮正隆用兵宋人執商州刺史
完顏守能以歸至是仲取守能與俱還上嘉之轉都點
檢兼侍衛親軍都指揮使遷河南路統軍使上曰卿在禁
近小心畏慎河南控制江淮為國重地卿益勉之賜廢
馬金帶玉吐鶻復有罪解職久之起為西北路招討使
改北京留守卒

哈里羅索族子體貌豐偉善用稍羅索為黃龍府萬戶
哈里從徙於舒吉鄂摩從羅索追及遼主於朔州阿敦
山遼主從數十騎逸去羅索遣哈里及珠敦往見遼主
諭之使降遼主已窮蹙待于阿敦山之東羅索因獲之
賞哈里金五十兩銀五百兩幣帛二百匹綿三百兩睿
宗經略陝西哈里戰却吳玠軍於涇邠之南尋遣修棧
道宋人恐棧道成以兵來拒破其兵賞銀百五十兩奴
婢十人天眷元年擢宿直將軍與定宗磐宗雋之亂再

遷廣威將軍除都水使者改西北路招討都監歷復州
灤州刺史伊囉幹羣牧使塔喇部族節度使同知大興
尹兼中都路兵馬都總管改武寧軍節度使廣寧尹卒
年六十二

尼楚赫宗室子太祖嗣位使普嘉努如遼取阿蘇事久
不決乃使實古納尼楚赫繼往當是時遼主荒于政上
下解體尼楚赫等還具以遼政事人情告太祖且言遼
國之狀太祖決意伐遼盖自尼楚赫等發之太祖與耶

律鄂爾多戰于達魯噶城遼兵二十餘萬尼楚赫羅索率衆衝其中堅凡九陷陣輒戰而出大敗遼軍尼楚赫為穆昆遂與羅索成邊復與羅索琿楚博勒和實古納等攻黃龍府敗遼兵萬餘于白馬濼太祖拒遼尼楚赫守達魯噶城收國二年分雅達納阿拉所遷穆昆二千戶以尼楚赫為穆昆屯寧江州遼大冊使實訥埒遣回約以七月半至而盡九月實訥埒未來上使諸軍過江屯駐遼伊喇滿達十三人兵士八人縱火于渾河以絕

芻牧尼楚赫獲之乃知遼邊吏伊蘇使之太祖命釋之
從都統杲克中京尼楚赫與實古納芬徹哈布爾率兵
三千擊奚王錫默于京西七十里錫默棄兵遯遼主西
奔天德尼楚赫以兵絕其後遼主遂見獲後從宗翰伐
宋圍太原宗翰進兵至澤州及宗翰還西京太原未下
皆命尼楚赫留兵圍之招討都監馬武破宋兵於文水
節度使耿守忠等敗宋黃迪兵於西都谷所殺不可勝
計宋樊夔施詵高豐等軍來救太原分兵據近部尼楚

赫與實實博囉烏蘇大破之索羅希破宋兵於太谷宋兵據太谷祁縣阿古喇巴爾斯復取之种師中出井陘據榆次救太原尼楚赫使鄂倫擊之破其軍和尼斬師中于殺熊嶺進攻宋制置使姚古軍于隆州谷大敗之薩喇圖敗宋軍於回馬口郭企忠殲宋軍于五臺及宗翰定太原與宗望會兵于汴尼楚赫等攻汴城克之師還尼楚赫降岢嵐寧化等軍攻嵐州拔之招降火山軍與希尹同賜鐵券宗翰趨洛陽色哩取汝州尼楚赫取

鄧州殺其將李操等蘇瑪拉入襄陽巴爾斯入均州馬
武取房州擒轉運使劉吉鄧州通判王彬巴爾斯破唐
蔡陳三州克潁昌沙瑋額哲別克舊潁昌宗翰會伐康
王尼楚赫守太原天會十年為燕京留守天會十三年
致仕加保大軍節度使同中書門下平章事遷中書令
封蜀王天眷三年薨年六十八以正隆例贈金源郡王
配享太宗廟庭大定十五年謚武襄改配享太祖廟庭
子古雲

古雲本名達蘭幼警敏有志膽初牝角太祖見而奇之
年十六父尼楚赫授以甲使從伐遼常為先鋒授世襲
穆昆宗翰自太原還西京尼楚赫圍守之古雲在行間
屢有功宋兵數萬救太原至南關尼楚赫與弟巴爾斯
完顏羅索等擊之當隘巷間一卒揮刀向巴爾斯古雲
以刀斷其腕一卒復從旁以槍刺之古雲斷其槍追殺
之拔太原下河東諸州攻汴京皆有功與都統馬武洵
地漢上至上蔡以先鋒破孔家軍睿宗攻開州古雲先

登流矢中其口睿宗親視之創未愈強起之攻大名府
第功宗弼第一古雲次之攻東平古雲居最巴爾斯襲
宋康王于揚州古雲為先鋒巴爾斯追宋孟后於江南
古雲前行趨潭州宋大兵在常武古雲以選兵薄其城
敗千餘人明日城中出兵來戰古雲以五百騎敗之獲
馬二百匹遂攻常武巴爾斯以諸軍為大陣居其後古
雲以五百騎為小陣當前行即麾兵馳宋軍宋軍亂遂
大敗之巴爾斯觀其周旋嘆賞之其後河東郡縣多叛

古雲以先鋒攻絳州克之復攻沁州飛礮擊其右脅昇
歸營中諸軍攻沁州三日不能下別將固納強起古雲
指麾士卒遂克之攝河東路都統從左監軍伊喇伊都
招西北諸部古雲將騎三千五百平其九部獲生口三
千馬牛羊十五萬以先鋒破宋吳山軍再戰再勝遂劔
宋兵于隘死者不可勝計宋兵遁去宗弼再取和尚原
古雲以本部破宋五萬人遂奪新義口宗弼留兵守之
是夜大雪道路皆冰和尚原宋兵勢重不可徑取宗弼

用古雲策入自傍近高山叢薄翳薈間出其不意遂取和尚原古雲請速入大散關自以本部為殿以備伏兵宗弼至仙人關古雲先攻之宗弼止之古雲不止宗弼以刀背擊其兜鍪使之退古雲曰敵氣已沮不乘此而取之後必悔之已而果然宗弼嘆曰既往不咎乃班師古雲殿且戰且却遂達秦中齊國初廢元帥右監軍薩里罕馳驛撫治諸郡至同州故齊觀察使李世輔出迎陽墜馬稱折臂昇歸薩里罕入城世輔詐使通判獻甲

以壯士十人被甲上廳事世輔自壁後突出執薩里罕

古雲方索馬于外變起倉卒不得入城門已閉皆有兵
衛至東門適哈達領騎三十餘與古雲遇遂斬門者出
而世輔擁衆自西門出古雲因與哈達襲之一進一退
以綴世輔使不得速世輔慮救兵至乃要薩里罕與之
盟勿使追之留薩里罕於道側古雲識其聲與騎而歸
除安遠大將軍攝太原戶四境咸治兼攝河東南北兩
路兵馬都總管朝廷以河南陝西與宋已而復取之師

至耀州宋人每旦出城張旗閱隊抵暮而還道隘騎不
得逞古雲請兵五百薄暮先使五十人趨山巔令之曰
旦日視敵出舉幟指其所向乃以餘兵伏山谷間明日
城中人出閱如前山巔旗舉伏兵發宋兵爭馳入城古
雲麾軍登城拔宋幟立金軍旗幟宋軍後者望見之不
敢入遂降城中人亦降宋吳玠擁重兵據涇州涇原以
西多應之元帥薩里罕欲退守京兆俟河南河東軍古
雲曰我退守吳玠必取鳳翔京兆同華據潼關吾屬無

類矣薩里罕曰計將安出古雲曰事危矣不如速戰我

軍陣涇之南原宋兵必自西原來古雲與錫卜察各以
選騎五百摧其兩翼元帥當其中擊之可以得志監軍
巴爾斯曰二子當其左右巴爾斯願當其中元帥據岡
阜多張旗幟為疑兵可以得志薩里罕從之吳玠兵果
自西原來古雲錫卜察擊其左右自旦至午吳玠左右
軍少退巴爾斯當其前衝擊之遂敗玠軍僵尸枕藉大
澗皆滿自此蜀人喪氣不敢復出關陝遂定歷行臺吏

部工部侍郎從宗弼巡邊遷刑部尚書轉元帥左都監

天德二年遷右監軍元帥府罷改山西路統軍使領西北西南兩路招討兵馬坐無功降臨海軍節度使歷平陽太原尹正隆末為中都留守兼西北面都統討契丹薩巴駐軍歸化州世宗即位於遼陽使古雲姪阿爾法持詔往命古雲為左副元帥就遣使召陝西統軍圖克坦喀齊喀宣大定改元詔赦于西南西北招討司河東河北山東諸路州鎮調明安軍屯京畿阿爾法見古雲

古雲猶豫未決士卒皆欲歸世宗古雲不得已乃受詔以元帥令下諸路亟泥馬槽二萬具諸路聞之以為大軍且至然後遣人宣赦所至皆聽命大定元年十一月古雲以軍至中都同知留守璋請至府議事古雲疑璋有謀乃陽許諾排節仗若將往者遂率騎從出施仁門駐兵通州見世宗于三河詔古雲以便宜規措河南陝西山東邊事二年正月至南京遂復汝潁嵩等州縣授世襲明安入拜平章政事罷為東京留守未行改濟南

尹初古雲宿將恃功在南京頗黷貨不恤軍民詔使問以邊事古雲不荅謂詔使曰爾解何事待我到闕奏陳及召入竟無一語及邊事者在相位多自專已所欲輒自奏行之除留守輒忿忿不接賓客雖近臣往亦不見上怒遂改濟南上數之曰朕念卿父有大功于國卿舊將亦有功故改授此職卿宜知之若復不悛非但不保官爵身亦不能保也古雲頓首謝久之改平陽尹致仕起為西京留守以母憂去官尋以本官起復俄復為東

京歷上京詔曰上京王業所起風俗日趨詭薄宗室聚
居號為難治卿元老大臣衆所聽服當正風俗檢制宗
室持以大體十五年致仕久之史臣上太宗睿宗實錄
上曰當時舊人親見者惟古雲在詔修撰溫特赫提克
德往北京就其家問之多所更定焉十九年薨年七十四最
前後以功被賞者十有一金為兩二百五十銀為兩六
千五百絹為疋八百綿為兩二千馬三百十有四牛羊
六千五百奴婢百三十人

瑪奇尼楚赫之母弟也年十五隸軍中從破高麗兵下
寧江州平係遼女直克黃龍府皆身先力戰以功為穆
昆繼領明安破奚兵千餘自烏楞古攻下咸信瀋州及
東京諸城瑪奇皆有功都統杲取中京與素赫和碩台
別降綽里特部屯兵高州以兵援蒙克貝勒大破敵兵
復敗恩州兵五萬人討平遼人聚中京山谷者降三千
餘人戰于高州境上伏矢射之中目遂卒瑪奇大小三
十餘戰所至皆捷皇統中贈銀青光祿大夫謚毅敏子

烏色

烏色年十七隸軍中從巴爾斯擊遼將馬武敗之瑪奇
死領其職宗望伐宋至河上宋兵屯于河外以二舟來
伺我師乃遣烏色率勇士數輩以一舟往迎之盡俘以
還襲康王於江淮間烏色皆與焉師還駐東平及廢齊
屯兵河北招降旁近諸營多獲畜產兵仗軍帥嘉之賞
以甲馬從攻陝西為右翼都統攻城破敵皆與有功師
還正授穆昆遷華州防禦使屬關中歲饑盜賊充斥烏

色募兵討平之部以無事郡人列狀丐留不報俄遷德
呼勒部族節度使改塔喇部用廉八為都水使者秩滿
同知燕京留守事為西北路招討使薩巴秩滿已數月
冒其俸祿不即解去烏色發其事薩巴反烏色遇害

巴爾斯尼楚赫弟天輔六年宗翰在北安州將會舍音
于奚王嶺遼兵奄至古北口使博勒和琿楚各領兵二
百擊之琿楚請濟師宗翰欲自往希尹羅索曰此易與
耳請以千人為公破之琿楚以騎士三十人前行至古

北口遇其遊兵逐入山谷遼人以步騎萬餘迫戰亡騎
五人琿楚退據關口希尹羅索至巴爾斯烏木罕呼實
罕推鋒奮擊大破之斬馘甚衆盡獲甲冑輜重希尹與
薩拉噶圖費摩托紐敗其伏兵殺千餘人獲馬百餘匹
羅索拒夏人出陵野嶺留巴爾斯以兵二百據險守之
尼楚赫圍太原近縣先已降宋軍來救太原者復據太
谷祁縣巴爾斯阿古喇復取之宋姚古軍隆州谷巴爾
斯敗之張灝兵出汾州又擊走之天會四年克太原巴

爾斯為管勾太原府路兵馬事復與羅索敗宋兵于文
水遂從宗翰圍汴與尼楚赫略地襄鄧入均州還攻唐
蔡陳三州皆破之克潁昌府遂與托雲馬武襲宋康王
于揚州康王渡江入于建康天會十五年遷元帥左都
監宗弼再定河南薩里罕經略陝西至涇州巴爾斯大
破宋軍于渭州渭州德順軍皆降陝西平遷元帥左監
軍加金吾衛上將軍卒諡敏定

實古納亦書作實古迺嘗與尼楚赫俱往遼國取阿蘇

還言遼人可取之狀太祖始決意伐遼矣博勒和取居庸關蕭妃自古北口出奔太祖使實古納追之不及後為臨潢府軍帥討平塔喇其羣官率衆降者請使就領諸部太宗賜以空名宣頭及銀牌使以便宜授之獲遼許王索囉駙馬都尉蕭伊遜遼梁王在哈里水雅里自立不知果在何處至是始知之於是徙遼降人於泰州時暑未可徙實古納請姑處之嶺西及實古納築新城於契丹珠敦城詔置會平州烏庫哩部人迪里華沙率

部族降朝廷以托卜嘉為本部節度使烏琿為都監實古納封還托卜嘉等宣誥以便宜加托卜嘉散官填空名告身授之及錄上降附有勞故官八百九十三人朝廷從之於是迪里加防禦使為本部節度華沙加諸司使為節度副使知達魯特部事達勒達加左金吾衛上將軍節度副使知圖吉部事阿實克加觀察使為本部節度其餘遷授有差以巴噶城之地分賜烏庫哩達魯特二部及契丹人其未墾者聽任力占射久之領咸州

烟火事天輔六年完顏慎思所部及其餘未置明安穆
昆戶口命實古納通閱具籍以上天會十年改南京路
軍帥司為東南路都統司實古納為都統移治東京鎮
高麗

贊曰金啓疆土幹魯烏楞古方面功最先著博勒和羅
索最先封泰州之邊圍黃龍之衝要寄亦重矣若棟摩
之勤勞南路羅索之經營陝西尼楚赫之圍守太原勞
亦至矣烏楞古之不治棟摩之敗譴罰之亟諸將懼焉

夫能以弱小終制彊大其效驗與尼楚赫實古納觀人之國而知其可伐古語云國有八觀善矣夫

金史卷七十二

總校官
金書
對官

總校官舉人臣章維桓

校對官主事臣金光悌

謄錄監生臣范沅

欽定四庫全書薈要

史部

金史卷七十三至
五

詳校官編修臣程嘉謨



欽定四庫全書蒼要卷六千三百十五

金史卷七十三

元中書右丞相總裁托克托等修

列傳第十一

鄂蘭哈瑪爾

晏

本名鄂倫

宗尹

本名阿里罕

宗寧

本名阿多古

宗道

本名巴克實

宗雄

本名摩囉歡

阿林

安塔哈

希尹

本名古紳

守貞

本名蘇頁

守能

本名呼喇

鄂蘭哈瑪爾景祖第八子也健捷善戰年十八拉必瑪
察據穆稜水叛烏春烏木罕以古哩甸兵助之世祖擒
拉必穆稜水人尚反側不自安使阿里罕先往撫察之
與薩布合兵攻烏木罕烏春已死烏木罕棄城遯去後
從薩哈討平埒克阿里罕其建功居多太祖擒蕭哈里
使阿里罕先來獻馘于遼太祖謀伐遼阿里罕在前實
贊成之及從征屢戰有功及太宗等勸進太祖未之許
也阿里罕以及普嘉努宗翰等曰今大功已集若不以

時建號無以繫天下心太祖曰吾將思之收國元年太祖即位阿里罕等并與宗翰以耕具九為獻祝曰使陛下毋忘稼穡之艱難太祖敬而受之頃之為古倫英寶貝勒為人聰敏辨給凡一聞見則終身不忘始未有文字祖宗族屬時事並能默記與色克同修本朝譜牒見人舊未嘗識聞其父祖名即能道其部族世次所出或積年舊事偶因他及之人或遺忘輒一一辨析言之有質疑者皆釋其意義世祖嘗稱其強記人不可及也天

輔三年寢疾宗翰曰往問之盡得祖宗舊俗法度疾病上幸其家問疾問以國家事對曰馬者甲兵之用今四方未平而國俗多以良馬殉葬可禁止之乃獻平生所乘戰馬及以馬獻太宗使其子富爾丹代為奏奏有誤語即哂之宗翰從傍為改定進奏訖薨年四十九上聞之阿里罕雖臨薨有奏事曰臨終不亂念及國家真賢臣也哭之慟及葬上親臨熙宗時追封隋國王天德中改贈開府儀同三司隋國公大定間配饗太祖廟廷謚

曰剛憲子賽音鄂倫賽音子宗尹

晏本名鄂倫景祖之孫阿里罕之次子也明敏多謀略
通契丹字天會初烏達噶叛太宗幸北京以晏有籌策
召問稱旨乃命督扈從諸軍往討之至混同江諭將士
曰今叛衆依山谷地勢險阻林木深密吾騎卒不得成
列未可以歲月破也乃具舟楫艤江令諸軍據高山連
木為柵多張旗幟示以持久計聲言俟大軍畢集而發
乃潛以舟師浮江而下直擣其營遂大破之據險之衆

不戰而潰月餘一境皆定師還授左監門衛上將軍為
廣寧尹入為吏禮兩部尚書皇統元年為北京留守改
咸平尹徙東京天德初封葛王入拜同判太宗正事進
封宋王授世襲明安海陵遷都晏留守上京授金牌一
銀牌二累封豫王許王又改越王貞元初進封齊時近
郊禁圍獵特畀晏三百人從獵在上京凡五年正隆二
年例削王爵改西京留守未幾為臨潢尹遂致仕還居
會寧海陵南伐世宗為東京留守將士皆自淮南來歸

晏之子伊呀納亦自軍前率衆來歸世宗白彥敬等在北京聞伊呀納等逃還使會寧同知高國勝拘晏家族上既即位遣使召晏既又遣晏兄子呼拉布馳驛促之晏遂率宗室數人入見即拜左丞相封廣平郡王宴勞彌日未幾兼都元帥大定二年正月上如山陵禮畢上將獵有司已夙備晏諫曰邊事未寧畋游非所宜也上嘉納之因謂晏等曰古者帝王虛心受諫朕常慕之卿等盡言毋隱進拜太尉復致仕還鄉里是歲薨詔有司

致祭賻贈銀幣甚厚

宗尹本名阿里罕以宗室子充護衛改牌印祇候授世襲穆昆為右衛將軍歷順天歸德彰化唐古部族橫海軍節度使正隆南伐領神略軍都總管先鋒渡淮取揚州及瓜洲渡大定二年改河南路副都統駐軍諸州之境是時宋陷汝州殺刺史烏克遜滿丕及漢軍二千人宗尹遣萬戶富珠哩定方完顏阿呼喇瓜爾佳清臣烏庫哩薩哈克楚額哲將騎四千往攻之遂復取汝州除大

名尹副統如故頃之為河東路統軍使遷元帥左都監
除南京留守上曰卿年少壯而心力多滯前任點檢京
尹勤力不怠而處事迷錯勉脩職業以副朕意賜通犀
帶廐馬八年置山東路統軍司宗尹為使遷樞密副使
錄其父功授世襲扶餘路屯河明安并親管穆昆除太
子太保樞密副使如故上問宰臣曰宗尹雖才無大過
人者而性行淳厚且國之舊臣昔為達官卿等尚未信
也朕欲以為平章政事何如宰執皆曰宗尹為相甚協

衆望即日拜平章政事封代國公兼太子太傅是時民間苦錢幣不通上問宗尹對曰錢者有限之物積於上者滯於下所以不通海陵軍興為一切之賦有菜園房稅養馬錢大定初軍事未息調度不繼故因仍不改今天下無事府庫充積悉宜罷去上曰卿留意百姓朕復何慮太尉守道老矣捨卿而誰於是養馬等錢始罷他日上謂宰臣曰宗尹治家嚴密他人不及也顧謂宗尹曰政事亦當如此矣有頃北方歲饑軍食不足廷議輸

粟賑濟或謂此雖不登而舊積有餘秋成在近不必更
勞輸輓宗尹曰國家平時積粟本以備凶歲也必待秋
成則憊者衆矣人有損瘠其如防戍何上從之宗尹乞
令子尼楚赫襲其明安會太尉守道亦乞令其子神果
努襲其穆昆凡承襲人不識女直字者勒令習學世宗
曰此二子吾識其一習漢字未習女直字自今女直契
丹漢字曾學其一者即許承襲遂著于令宗尹有疾不
能赴朝上問宰臣曰宗尹何為不入朝太尉守道以疾

對上曰丞相志寧嘗言若詔遣征伐所不敢辭宰相之職實不敢當宗尹亦豈此意邪二十四年世宗將幸上京上曰臨潢烏庫哩實壘歲皆不登朕欲自南道往三月過東京謁太后陵寢五月可達上京春月烏獸孳孕東作方興不必蒐田講事卿等以為何如宗尹曰南道歲熟芻粟賤宜如聖旨遂由南道往焉世宗至上京聞同簽大宗正事宗寧不能撫治上京宗室宗室子往往不事生業上謂宗尹曰汝察其事宜懲戒之宗尹奏曰

隨仕之子父沒不還本土以此多好游蕩上命召還宴
宗室于皇武殿擊毬為樂上曰賞賜宗室亦是小惠又
不可一槩遷官欲令諸局分收補其間人材孰可者宗
尹對曰奉國威準之子按春豫國公昱之曾孫阿魯皆
可任使上曰度可任以何職更訪其餘以聞詔以按春
阿魯為奉御二十七年乞致仕世宗曰此老不事事從
其請可也宰臣奏曰舊臣宜在左右上曰宰相總天下
事非養老之地若不堪其職朕亦有愧焉如賢者在朝

利及百姓四方瞻仰朕亦與其光美宰臣無以對宗尹
入謝上曰卿久任外官不聞有過失但恨用卿稍晚今
精力似衰矣省事至煩若勉留卿則四方以朕為私卿
亦不自安也頃之上問宗尹子汝父致仕將居何所其
子曰聚屬既多不能復在京師上遣使問宗尹曰朕欲
留卿時相從游卿子之言如此今定如何宗尹曰臣豈
不欲在此但餘閑之年猶在輦下恐聖主心困耳既哀
老臣不忍擯棄時時得瞻望天顏臣豈敢他往鄉里故

老無存者雖到彼尚將與誰游乎於是賜甲第一區凡宴集畋獵皆從焉二十八年薨

宗寧本名阿多古系出景祖太尉阿里罕之孫也性勤厚有大志起家為海陵征南都統戰瓜洲渡功最歷祁州刺史大定二年為會寧府路押軍萬戶擢歸德軍節度使時方旱蝗宗寧督民捕之得死蝗一斗給粟一斗數日捕絕移鎮寧昌軍改知臨潢府事移天德軍世宗嘗謂宰臣曰宗寧志慮雖淺然所至人皆愛之即命為

行軍右翼都統為賀宋正旦使累遷兵部尚書授隆州
路和屯明安羅里茂世襲穆昆出知大名府事徙鎮利
涉軍俄同簽大陸親府事宗寧多病世宗欲以涼地處
之俾知咸平詔以其子符寶郎直為韓州刺史以便養
無幾入授同判大陸親府事拜平章政事明昌二年薨
宗寧居家約儉如寒素臨事明敏其鎮臨潢鄰國有警
宗寧聞知乏糧即出倉粟令以牛易之敵知得粟即遁
去邊人以幹罕亂後苦無牛宗寧復令民入粟易牛既

而民得牛而倉粟倍於舊其經畫如此

宗道本名巴克實上京司屬司人系出景祖太尉鄂倫之
少子也通周易孟子善騎射大定五年充閣門祗候累
除近侍局使右丞相烏庫哩元忠左將軍布薩揆等嘗
燕集有所竊議宗道即密以聞世宗嘉之授右衛將軍
出為西南路副招討章宗即位改同知平陽府事陝西
路副統軍左宣徽使伊喇仲方舉以自代除西北路招
討使故事諸部駕馬八百餘疋宗道辭不受諸部悅服

邊鄙順治提刑司察廉召為殿前右副都點檢尋除陝西路統軍使以鎮靜得軍民心特遷三階兼知京兆府事時夏旱俾長安令取太白湫水步迎於遠郊及城而雨是歲大稔人以為精意所感刊石紀之承安二年為賀宋正旦使尋授河南路統軍使泗州民張偉獲宋人王萬言彼界事情宗道疑其寃乃廉問得實萬楚州賈人偉負萬貨五千餘貫三年不償萬理索為偉所誣乃坐偉而歸萬時人服其明後乞致仕朝廷知非本心改

知河中府有惠政民立像於層觀以時祭之移知臨洮以病解泰和四年卒贈龍虎衛上將軍

宗雄本名摩囉歡康宗長子其始生也世祖見而異之曰此兒風骨非常他日必為國器因解佩刀使常置其側曰俟其成人則使佩之九歲能射逸兔年十一射中奔鹿世祖坐之膝上曰兒幼已然異日出倫輩矣以銀酒器賜之既長風表奇偉善談辯多智略孝敬謙謹人愛敬之康宗沒遼使愛錫拉布來乘馬至靈帷階下擇取

賄贈之馬太祖怒欲殺愛錫拉布宗雄諫太祖乃止太祖
將舉兵宗雄曰遼主驕侈又不知兵可取也不能擒一
蕭哈里而我兵擒之太祖善其言攻寧江州渤海兵銳
甚宗雄以所部敗渤海兵以功授世襲千戶穆昆太祖
敗遼兵于珠赫店宗雄摧鋒力戰功多達魯噶城之役
宗雄將右軍身先士卒戰遼兵當右軍者已却上命宗
雄助左軍擊遼兵宗雄繞遼兵後擊之遼兵遂大潰乘
勝逐北日已暮圍之黎明遼兵突圍出追殺至頁魯伯

奇而還上撫其背曰朕有此子何事不濟以御服賜之
及遼帝以七十萬衆至圍們諸將皆曰遼軍勢甚盛不
宜速戰宗雄曰不然遼兵雖衆而皆庸將士卒惴惴不
足畏也戰則破之掌握間耳上曰善追及遼帝于呼岱
巴岡宗雄率衆直前短兵接宗雄令前行持挺擊遼兵
馬首後行者射之大敗遼兵上嘉宗雄功執其手勞之
以御介冑及御戰馬寶貨奴婢賜之舍音攻春州宗雄
與宗幹羅索取金山縣行近白鷹林獲候者七人縱其

一人使歸縣人聞大軍至迺潰遂下金山縣與舍音俱取泰州太祖自將取臨潢府遣宗雄先啟行遇遼兵五千宗雄與戰大軍亦至大破之及留守托卜嘉降上以其女與宗雄賞其啟行破遼援兵之功也既而與普嘉努按視泰州地土宗雄包其土來奏曰其土如此可種植也上從之由是徙萬餘家屯田泰州以宗雄等言其地可種藝也西京既降復叛時糧餉垂盡議欲罷攻宗雄曰西京都會也若委而去之則降者離心遼之餘黨

與夏人得以窺伺矣乃立重賞以激士心旣而夜中有
火大如斗墜于城中宗雄曰此城破之象也及克西京
賜宗雄黃金百兩衣十襲及奴婢等與宗翰等擊耿守
忠兵七千于西京之東四十里大破之迎謁太祖于鴛
鴦樂從至歸化州疾篤宗幹問所欲言宗雄曰國家大
業旣成主上壽考萬年肅清四方死且無恨天輔六年
薨年四十太祖來問疾不及見哭之慟謂羣臣曰此子
謀略過人臨陣勇決少見其比賻贈加等詔哈濟千戶

駙馬實嘉努護喪歸葬於歸化州仍於死所建佛寺宗

雄好學嗜書嘗從上獵誤中流矢而神色不變恐上知之而罪及射者既拔去其矢託疾歸家臥兩月因學契丹大小字盡通之凡金國初建立法定制皆與宗幹建白行焉及與遼議和書詔契丹漢字宗雄與宗翰希尹主其事而材武驕捷挽強射遠幾二百步嘗走馬射三麋已中其二復彎弓馬蹶躍而下控弦如故遂殼滿步射獲之宗雄方逐兔達蘭亦從後射之已發矢達蘭大

呼曰矢及矣宗雄反顧以手接其矢就射兔中之其輕
健如此天眷中追封太師齊國公天德二年加秦漢國
王正隆二年改太傅金源郡王大定二年追封楚王諡
威敏配享太祖廟廷十五年圖像于衍慶宮子富勒呼
安塔哈阿林孫常春呼喇勒呼喇呼嚕徹珍帕克巴恩
楚初宗幹納宗雄妻海陵銜之及篡位使宿直將軍晁
霞牌印閭山往河間四宗雄妻於府署明日與其子婦
及常春兄弟徹珍之子七人皆殺而焚之棄其骨於濠

水大定十七年詔有司收葬初富勒呼襲明安富勒呼
卒贈金紫光祿大夫子和勒端襲之官至金吾衛上將軍
和勒端卒子雲闡未襲而死章宗命宗雄孫富德襲之富
德大定末累官同簽大睦親府事章宗即位初置九路
提刑司富德為北京臨潢提刑使詔曰朕初即位憂勞
萬民每念刑獄未平農桑未勉吏或不循法度以隳吾
治朝廷詔使廉問事難周悉惟提刑勸農采訪之官自
古有之今分九路專設是職爾其盡心往撫乃事自熙

宗時遣使廉問吏治得失世宗即位凡數歲輒一遣黜陟之故大定之間郡縣吏皆奉法百姓滋殖號為小康或謂廉問使者頗以愛憎立殿最以問宰相宰相曰臣等復為陛下察之是以世宗嘗欲立提刑司而未果章宗追述先朝遂於接位之初行之及九路提刑使朝辭于慶和殿上曰建立官制當寬猛得中凡軍民事相涉者均平決遣鈐束家人部曲勿使沮擾郡縣事今以司獄隸提刑司惟冀獄犴無冤耳既退復遣近臣諭之曰

卿等皆妙簡才良付心專責盡心舉職別有旌賞否則有罰明年富德乃襲明安云

阿林穎悟辯敏通女直契丹大小字及漢字幼時嘗入宮熙宗見而奇之曰是兒他日必能宣力國家年十八授定遠大將軍為順天軍節度使天德二年用廉遷益都尹兼山東東路兵馬都總管歷泰寧定海鎮西安國等軍節度海陵南伐以為神勇武平等軍都總管由壽州道渡淮與勸農使伊喇元宜合兵三萬為先鋒是歲

十月至廬州與宋將王權軍十餘萬戰于柘臯鎮蔚子
橋敗之至和州南復與王權軍八萬餘會戰又敗之追
殺至江上斬首數千級上即位于遼陽海陵死大軍北
還將渡淮而舟楫甚少軍士爭舟不得亟渡阿林得生
口知可涉處識以柳枝命本部涉濟既至北岸而諸軍
之爭渡者果為宋人邀擊之及入見上聞阿林淮上戰
功又以全軍還遷兵部尚書監督經畫征幹罕諸軍糧
餉授以金牌一銀牌四幹罕敗還至懿州以疾卒喪至

京師上命致祭于永安寺百官赴吊賻銀五百兩重綵三十端絹百匹

安塔哈又名鄂勒歡宗雄次子也性端重不輕發有父之風年十五太祖賜以一品傘二十餘御毬場分朋擊毬連勝三算宗工舊老咸異之進呈所勝禮物安塔哈為班首太宗喜曰今日之勝此孫之力也賞之獨厚天眷二年襲父明安除大宗正丞以明安讓兄子和勒端加武定軍節度使奉朝請改侍衛親軍都指揮使封金源

郡王進封譚王遷同判大宗正事別授世襲明安海陵
將遷中都安塔哈諫曰棄祖宗興王之地而他徙非義
也海陵不悅留之上京久之進封鄆王改封魏王除濟
南尹安塔哈不堪卑濕多在病告海陵聞之改西京留
守正隆例奪王爵改廣寧尹世宗即位于東京赦令至
廣寧弟雅爾堅勸安塔哈拒弗受安塔哈受之會海陵遣
使至城下安塔哈登城告使者曰此府迫近遼陽勢不
能抗聊且從命非得已也雅爾堅亦登譙樓與使者語指

斥不遜及諸郡皆詣東京安塔哈兄弟亦上謁有司議

既拜赦令復有異言持兩端請併誅之上曰正隆剪刈

宗室朕不可效尤安塔哈為弟所惑耳於是釋安塔哈

誅雅爾堅不數日復判大宗正事再遷太子太保封蘭

陵郡王改勸農使海陵時自上京徙河間土瘠詔安塔

哈一族二十五家從便遷居近地乃徙平州詔給平州

官田三百頃屋三百間宗州官田一百頃進金源郡主

致仕大定八年召見上曰宗室耆老如卿者能幾人邪

賜錢萬貫甲第一區留京師使預巡幸毬獵宴會十四
年薨年六十七臨終戒諸子曰汝輩勿以生富貴中而
為暴戾宜自謙退海陵以猜忌剪滅宗室我以純謹得
免死耳汝輩惟日為善勿墜吾家

完顏希尹本名固新罕都之子也自太祖舉兵常在行
陣或從太祖或從薩拉噶或與諸將征伐比有功金人初
無文字國勢日強與鄰國交好迺用契丹字太祖命希
尹撰本國字備制度希尹乃依倣漢人楷字因契丹字

制度合本國語製女直字天輔三年八月字書成太祖

大悅命頒行之賜希尹馬一匹衣一襲其後熙宗亦製

女直字與希尹所製字俱行用希尹所撰謂之女直大

字熙宗所撰謂之小字遼人達魯華禪伊勒希棄中京

走希尹與都古嚕訥洛索伊都襲之達魯等聞希尹兵復

走遂降其旁近人民而還奚人羅和來降希尹使羅和

招其父西節度使額哩呼額哩呼以本部降宗翰駐軍

北安使希尹經略近地獲遼護衛耶律錫里埒知遼主

獵于鴛鴦澤宗翰遂請進兵宗翰將會都統杲于奚王
嶺遼兵屯古北口使博勒和將兵二百擊之瑄楚亦將
二百人為後援瑄楚聞遼兵衆請益兵宗翰欲親往希
尹洛索曰此小寇請以千兵為公破之瑄楚至古北口
遇遼遊兵逐之入谷中遼步騎萬餘追戰死者數人瑄
楚據關口希尹等至大破遼兵斬馘甚衆盡獲甲冑輜
重復敗其伏兵殺千餘人獲馬百餘匹遂與宗翰至奚
王嶺期會於羊城澤宗翰襲遼帝于五院司希尹為前

驅所將纔八騎與遼主戰一日三敗之明日希尹得降人瑪展言遼主在漠委輜重將奔西京幾及遼主于白水灤南遼主以輕騎遯去盡獲其內庫寶物遂至西京西京降使芬徹守之希尹至伊實部不及遼主而還及宗翰入朝希尹權西南西北兩路都統是時夏人已受盟遼主已獲耶律達什自立而夏國與洛索書責諸帥棄盟軍入其境多掠取者希尹上其書且奏曰聞夏使人約達什取山西諸郡以臣觀之夏盟不可信也上曰

夏事酌宜行之軍入其境不知信與否也達什合謀不可不察其嚴備之及大舉伐宋希尹為元帥右監軍再伐宋執二主以歸師還賜希尹鐵券除當赦不原之罪餘釋不問宗翰伐康王希尹追之于揚州康王遂去後與宗翰俱朝京師請立熙宗為儲嗣太宗遂以熙宗為安班貝勒及熙宗即位希尹為尚書左丞相兼侍中加開府儀同三司希尹為相有大政皆身先執咎天眷元年乞致仕不許罷為興中尹二年復為左丞相兼侍中

俄封陳王與宗幹共誅宗磐宗雋三年賜希尹詔曰師
臣密奏姦狀已萌心在無君言宣不道逮燕居而竊議
謂神器以何歸稔於聽聞遂致章敗遂賜死并殺右丞
蕭慶并希尹子同脩國史巴達符寶郎滿達是時熙宗
未有皇子故嫉希尹者以此言譖之皇統三年上知希
尹實無他心而死非其罪贈希尹儀同三司邢國公改
葬之蕭慶銀青光祿大夫天德三年追封豫王正隆二
年例降金源郡王大定十五年諡貞憲孫守道守貞守

能守道自有傳

守貞本名蘇頁貞元二年襲祖固新穆昆大定改元收
充符寶祇候授通進除彰德軍節度副使遷北京留守
移上京坐安置契丹戶民部內娶妻杖一百除名二十
五年起為西京警巡使世宗愛其剛直授中都左警巡
使遷大興府治中進同知改同知西京留守事御史臺
奏守貞治有善狀世宗因謂侍臣曰守貞勲臣子又有
材能全勝其兄守道它日可用也章宗即位召為刑部

尚書兼右諫議大夫守貞與脩起居注張暉奏言唐中書門下入閣諫官隨之欲其預聞政事有所開說又起居郎起居舍人每皇帝視朝左右對立有命則臨階俯聽退而書之以為起居注緣侍從官每遇視朝正合侍立自來左司上殿諫官脩起居注不避或侍從官除授及議便遣始令避之比來一例令臣等迴避及香閣奏陳言文字亦不令臣等侍立則凡有聖訓及所議政事臣等無緣得知何所記錄何所開說似非本設官之義

若漏泄政事自有不密罪上從之尋為賀宋生日使還
拜參知政事時上新即政頗銳意於治嘗問漢宣帝綜
核名實之道其施行之實果如何守貞誦樞機周密品
式詳備以對上曰行之果何始守貞曰在陛下厲精無
倦耳久之進尚書左丞授上京世襲穆昆明昌三年夏
早天子下詔罪已守貞惶恐表乞解職詔曰天嗇時雨
荐歲為災所以警懼不逮方與二三輔弼圖回遺闕宜
思有以助朕脩政上答天戒消沴召和以康百姓卿達

機務朕所親倚而引咎求去其如思助何守貞懇辭乃
出知東平府命參知政事瓜爾佳衡諭之曰卿勲臣之
裔早登膺仕才用聲績朕所素知故嗣位之初擢任政
府于今數載毗贊實多既久任繁劇宜均適逸安矧內
外之職亦當更治今特授卿是命東平素號雄藩兼比
年饑歉正賴經畫卿其為朕往綏撫之仍賜金幣廐馬
以寵其行它日上問宰臣守貞治東平如何對曰亦不
勞力上曰以彼之才治一路誠有餘矣右丞劉瑋曰方

今人材無出守貞者淹留于外誠可惜也上默然尋改
西京留守監察御史富拉塔劾奏守貞前宴賜北部有
取受事不報右拾遺路鐸上章辯之四年召拜平章政
事封蕭國公上御後閣召守貞曰朕以卿乃太師所舉
故特加委用然比者行事多太過門下人少慎擇復與
丞相不協以是令卿補外載念我昭祖太祖開創以來
乃祖佐命積有勲勞茲故召用卿其勉盡乃心與丞相
議事宜相和諧率循舊章無輕改革因賜玉帶併以富

拉塔所彈事與之曰朕度卿必不爾故以示卿舊制監

察御史凡八員漢人四員皆進士而女直四員則文資

右職叅注守貞曰監察乃清要之職流品自異俱宜一

體純用進士一日奏事次上問司吏移轉事守貞曰今

吏權重而積弊深移轉為便上嘗歎文士卒無如党懷

英者守貞奏進士中若趙沍王庭筠甚有時譽上曰出

倫者難得爾守貞曰間世之才自古所難然國家培養

久則人材將自出矣守貞因言國家選舉之法惟女直

漢人進士得人居多此舉更宜增取其諸司局承應人舊無出身大定後才許敘使經童之科古不常設唐以諸道表薦或取五人至十人近代以為無補罷之本朝皇統間取及五十人因為常選天德間尋以停罷陛下即位復立是科朝廷寬大放及百數誠恐積久不勝銓擬宜稍裁減以清流品又言節用省費之道並嘉納焉先是鄭王永蹈等伏誅上以其家產均給諸王戶部郎中李敬義言恐因之生事上又以董壽為官籍監都管

勾並下尚書省議守貞奏陛下欲以永蹈等家產分賜
懿親恩命已出恐不可改今已減諸王弓矢府尉司其
出入臣以為賜之無害如董壽罪人也特恩釋之已為
幸矣不宜更加爵賞上是守貞所言自明昌初北邊屢
有警或請出兵擊之上曰今方南議塞河而復用兵於
北可乎守貞曰彼屢突軼吾圉今一懲之後當不復來
明年可以見矣上因論守禦之法守貞曰惟有皇統以
前故事捨此無法爾守貞讀書通法律明習國朝故事

時金有國七十年禮樂刑政因遼宋舊制雜亂無貫章
宗即位乃更定脩正為一代法其儀式條約多守貞裁
訂故明昌之治號稱清明又喜推轂善類接援後進朝
廷正人多出入門下先是上以疑忌誅鄭王永蹈後張
汝弼妻高托噶獄起意又若在鎬王永中時右諫議大
夫賈守謙上疏陳時事思有以寬解上意右拾遺路鐸
繼之言尤切直帝不悅守貞持其事獄久不決帝疑有
黨乃出守貞知濟南府事仍命即辭前舉守貞者董師

中路鐸等皆補外上語宰臣曰守貞固有才力至其讀書方之真儒則未也然太邀權譽以彼之才而能平心守正朝廷豈可少離今茲令出蓋思之熟矣俄以在政府日嘗與近侍竊語宮掖事而妄稱奏下上命有司鞫問守貞款伏奪官一階解職遣中使持詔責諭之曰挾姦罔上古人常刑結援養交臣之大戒孰謂予相乃蹈厥辜爾本出勲門寢登膺仕朕初嗣位亟欲用卿未閱歲時升為宰輔每期納誨共致太平蓋求所長不考其

素拔擢不為不峻任用不為不專曾報効之弗思輒私
權之自樹交通近侍密問起居窺測上心預圖趨向繇
患失之心重故欺君之罪彰指所無之事而妄以肆誣
實未始有言而謂之嘗諫義豈知於歸美意專在於要
君其飾詐之若然豈為臣之當爾復觀彈奏益見私情
求親識之援而列布宮中縱罪廢之餘而出入門下而
又凡有官使斂為已恩謂皆涉於回邪不宜任之中外
質之清議固所不容揆之乃心烏得無愧姑從輕典庸

示薄懲仍以守貞不公事宣諭百官於尚書省承安元年降授河中防禦使五年改博勒和扎薩克節度使過闕上賜手詔責諭之令赴職久之遷知都府事時南鄙用兵上以山東重地須大臣安撫乃移知濟南府卒上聞而悼之勅有司致祭賻贈禮物依故平章政事富察通例諡曰肅守貞剛直明亮凡朝廷論議及上有所問皆傳經以對上嘗與泛論人材守貞乃述其心術行事臧否無少隱故為胥持國輩所忌竟以直罷後趙秉文

由外官入翰林遽上書言願陛下進君子退小人上問君子小人為誰秉文對君子故相完顏守貞小人今叅知政事胥持國其為天下推重如此

守能本名呼喇累官商州刺史正隆末宋人陷商州守能被執大定五年宋人請和誓書曰俘虜之人盡數發還完顏仲為報問國信使求守能及新息縣令完顏阿禪於宋遂與俱歸守能等至京師入見詔給舊官之俸大定十九年為西北路招討使是時詔徙幹罕餘黨于

臨潢泰州伊喇密拉嘗從幹罕其弟齋達當徙而偽稱

身亡以馬賂守能固匿不遣及受賕補賽音番部通事

事覺是時烏庫哩實壘部族節度副使實新安巴杖殺

無罪鎮邊明安尚書省俱奏其事上曰守能由刺史超

擢至此敢恣貪墨向者招討司官多進良馬橐駝鷹鷂

等物蓋假此以率斂爾自今並罷之因責其兄守道曰

守能自刺史躡遷招討外官之尊無以踰此前招討扎

克丹以貪伏誅守能豈不知乃敢如此其意安在爾之

親弟何不先訓戒之也上謂宰臣曰監察專任糾彈宗
州節度使阿索美初之官途中侵擾百姓到官舉動皆
違法度完顏守能為招討使貪冒狼藉凡達官貴人皆
未嘗舉劾阿都齊羣牧副使布薩納延取部人毬杖兩
枝即便彈奏自今監察御史職事脩舉然後遷除不舉
職者大則降罰小則決責仍不得去職尚書省奏守能
兩贓俱不至五十貫抵罪實新安巴解見居官并解世
襲穆昆上曰此舊制之誤居官犯除名者與世襲併罷

之非犯除名者勿罷遂著于令特詔守能杖二百除名
贊曰彼阿里罕氏之善頌宗雄之強識希尹之敏學益
之以征伐之功豈不偉哉

金史卷七十三

欽定四庫全書薈要卷六千三百十六

金史卷七十四

元中書右丞相總裁托克托等修

列傳第十二

宗翰

本名尼堪

孫色克

宗望

本名幹里雅布

子齊文京

宗翰本名尼瑪哈漢語訛為尼堪國相薩哈之長子也
年十七軍中服其勇及議伐遼宗翰與太祖意合太祖

敗遼師于境上獲耶律色實薩哈使宗翰及完顏希尹
來賀捷即稱帝為賀及太宗以下宗室羣臣皆勸進太
祖猶謙讓宗翰與阿里罕與普嘉努等進曰若不以時
建號無以繫天下心太祖意乃決遼都統耶律鄂爾多
以二十餘萬戍邊太祖逆擊之宗翰為右軍大敗遼人
于達嚕噶城天輔五年四月宗翰奏曰遼主失德中外
離心我朝興師大業既定而根本弗除後必為患今乘
其釁可襲取之天時人事不可失也太祖然之即命諸

路戒備軍事五月戊戌射柳宴羣臣上顧謂宗翰曰今
議西征汝前後計議多合朕意宗室中雖有長於汝者
若謀元帥無以易汝汝當治兵以俟師期上親酌酒飲
之且命之醕解御衣以衣之羣臣言時方暑月乃止無
何為伊拉齊貝勒副普嘉努西襲遼帝不果行十一月
宗翰復請曰諸軍久駐人思自奮馬亦壯健宜乘此時
進取中京羣臣言時方寒太祖不聽竟用宗翰策於是
烏赫哩貝勒杲都統內外諸軍普嘉努宗翰宗幹宗

磐副之宗峻領哈濟明安皆受金牌伊都為鄉導取中
京實北京既克中京宗翰率偏師趨北安州與洛索圖克
坦綽里合兵大敗奚王錫默北安遂降宗翰駐軍北安
遣希尹經畧近地獲遼護衛耶律實訥埒迺知遼主獵
于鴛鴦灤殺其子晉王額魯溫衆益離心西北西南兩
路兵馬皆羸弱不可用宗翰使諾延溫都伊喇保報都
統杲曰遼主窮迫於山西猶事畋獵不恤危亡自殺其
子臣民失望攻取之策幸速見諭若有異議此當以偏

師討之杲使瑄都與伊喇保同來報曰頃奉詔旨不令便趨山西當審詳徐議當時宗翰使人報杲即整衆俟兵期及瑄都至知杲無意進取宗翰恐待杲約或失機會即決策進兵使伊喇保復往報都統曰初受命雖未令便取山西亦許便宜從事遼人可取其勢已見一失機會後難圖矣今已進兵當與大軍會于何地幸以見報宗翰勸杲當如宗翰策杲意乃決約以奚王嶺會議宗翰至奚王嶺與都統杲會杲軍出青嶺宗翰軍出瓢

嶺期于羊城灤會軍宗翰以精兵六千襲遼主聞遼主
自五院司來拒戰宗翰倍道兼行一宿而至遼主遁去
乃使希尹等追之西京復叛耿守忠以兵五千來救至
城東四十里富察烏哩固納先擊之斬首千餘宗翰宗
雄宗幹宗峻繼至宗翰率麾下自其中衝擊之使餘兵
去馬從旁射之守忠敗走其衆殲焉宗翰弟扎巴台沒
于陣天眷中贈扎巴台特進云宗翰已撫定西路州縣
部族謁上于行在所遂從上取燕京燕京平賜宗翰希

尹達蘭耶律伊都金器有差太祖旣以燕京與宋人還

軍次鴛鴦濼不豫將歸京師以宗翰為都統齎貝勒

昱德特貝勒幹魯副之駐軍雲中太宗即位詔宗翰曰

寄爾以方面當遷官資者以便宜除授因以空名宣頭

百道給之宋人來請割諸城宗翰報以武朔二州宗翰

請曰宋人不歸我叛亡阻絕燕山往來道路後必敗盟

請勿割山西郡縣太宗曰先皇帝嘗許之矣當與之諸

將獲耶律瑪格宗翰歸之京師詔以馬七百匹給宗翰

軍以田種千石米七千石賑新附之民詔曰新附之民
比及農時度地以居之宗翰請分宗望達蘭錫古納精
兵討諸部詔曰宗望軍不可分別以精銳五千給之宗
翰朝太祖陵入見上奏曰先皇帝時山西南京諸部漢
官軍帥皆得承制除授今南京皆循舊制惟山西優以
朝命詔曰一用先皇帝燕京所降詔敕從事卿等度其
勤力而遷授之宗翰復奏曰先皇帝征遼之初圖宋協
力夾攻故許以燕地宋人既盟之後請加幣以求山西

諸鎮先皇帝辭其加幣盟書曰無容匿逋逃誘擾邊民
今宋數路招納叛亡厚以恩賞累疏叛人姓名索之童
貫嘗期以日月約以誓書一無所致盟未期年今已如
此萬世守約其可望乎且西鄙未寧割付山西諸郡則
諸軍失屯據之所將有經畧或難持久請姑置勿割上
悉如所請上以宗翰破遼經略夏國奉表稱藩深嘉其
功以馬十匹使宗翰自擇二匹餘賜羣帥及幹魯奏宗
不遣歲幣戶口事且將渝盟不可不備太宗命宗翰取

諸路戶籍按籍索之而棟摩再奏宋敗盟有狀宗翰宗望俱請伐宋於是安班貝勒杲領都元帥居京師宗翰為左副元帥自太原路伐宋宗翰發自河陰遂降朔州克代州圍太原府宋河東陝西軍四萬救太原敗于汾河之北殺萬餘人宗望自河北趨汴久不聞問遂留尼楚赫等圍太原宗翰率師而南降定諸縣及威勝軍下隆德府實潞州軍至澤州宋使至軍中始知割三鎮講和事路允迪以宋割太原詔書來太原人不受詔宗

翰取文水及孟縣復留尼楚赫圍太原宗翰乃還山西
宋少帝誘蕭仲恭貽書伊都以興復遼社稷以動之蕭
仲恭獻其書詔復伐宋八月宗翰發自西京九月丙寅
宗翰克太原執宋經略使張孝純等呼沙呼取平遙降
靈石介休孝義諸縣十一月甲子宗翰自太原趨汴降
威勝軍克隆德府遂取澤州薩喇達等先已破天井關
進逼河陽破宋兵萬人降其城宗翰攻懷州克之丁亥
渡河閏月宗翰至汴與宗望會兵宋約畫河為界復請

修好不克和丙辰尼楚赫等克汴州辛酉宋少帝詣軍
前舍青城十二月癸亥少帝奉表降詔元帥府曰將帥
士卒立功者第其功之高下遷賞之其殞身行陣沒於
王事者厚卹其家賜贈官爵務從優厚使勛就軍中勞
賜宗翰宗望使皆執其手以勞之四月以宋二主及其
宗族四百七十餘人及珪璋寶印袞冕車輅祭器大樂
靈臺圖書與大軍北還七月賜宗翰鐵券除反逆外餘
皆不問賜與甚厚宗翰奏河北河東府鎮州縣請擇前

資官良能者任之以安新民上遣耶律暉等從宗翰行
詔黃龍府路南路東京路於所部各選如耶律暉者遣
之宗翰遂趨洛陽宋董植以兵至鄭州鄭州人復叛宗
翰使諸將擊董植軍復取鄭州遂遷洛陽襄陽潁昌汝
鄭均房唐鄧陳蔡之民于河北而遣洛索平陝西州郡
是時河東寇盜尚多宗翰乃分留將士夾河屯守而還
師山西昏德公致書請立趙氏奉職修貢民心必喜萬
世利也宗翰受其書而不答康王遣王師正奉表密以

書招誘契丹漢人獲其書奏之太宗下詔伐康王河北諸將欲罷陝西兵併力南伐河東諸將不可曰陝西與西夏為鄰事重體大兵不可罷宗翰曰初與夏約夾攻宋人而夏人弗應而耶律達實在西北交通西夏吾舍陝西而會師河北彼必謂我有急難河北不足虞宜先事陝西畧定五路既弱西夏然後取宋宗翰蓋有意於夏人也議久不決奏請于上上曰康王構當窮其所往而追之俟平宋當立藩輔如張邦昌者陝右之地亦未

可置而不取於是洛索芬徹帥師勝額博勒和監戰平
陝西尼楚赫守太原耶律伊都留西京宗翰會東軍于
黎陽津遂會睿宗于濮進兵至東平宋知府權邦彥棄
家宵遁降其城駐軍東平東南五十里復取徐州先是
宋人運江淮金幣皆在徐州官庫盡得之分給諸軍襲
慶府來降宋知濟南府劉豫以城降于達蘭乃遣巴爾
斯烏凌阿托雲馬武襲康王于揚州未至百五十里馬
武以五百騎先馳至揚州城下康王聞兵來已于前一

夕渡江矣於是康王以書請存趙氏社稷先是康王嘗致書元帥府稱大宋皇帝構致書大金元帥帳前至是乃貶去大號自稱宋康王趙構謹致書元帥閣下其四月七日兩書皆然元帥府荅其書招之使降於是達蘭宗弼巴爾斯馬武等分道南伐宗弼之軍渡江取建康入于杭州康王入海阿里富埒瑄等自明州行海三百里追之弗及宗弼乃還其後宗翰欲用徐文策伐江南睿宗宗弼議不合乃止語在劉豫傳歸德叛都統大嘉

哩平之初太宗以舍音為安班貝勒自天會八年舍音薨久虛此位而熙宗宗峻子太祖嫡孫宗幹等不以言太宗而太宗亦無立熙宗意宗幹朝京師謂宗幹曰儲嗣虛位頗久哈喇先帝嫡孫當立不早定之恐授非其人宗幹日夜未嘗忘此遂與宗幹希尹定議入言於太宗請之再三太宗以宗幹等皆大臣義不可奪乃從之遂立熙宗以為安班貝勒於是宗幹遂為固倫右貝勒兼都元帥熙宗即位拜太保尚書令領三省事封晉國

王乞致仕詔不許天會十四年薨年五十八追封周宋國王正隆二年例封金源郡王大定間改贈秦王謚桓忠配享太祖廟庭孫秉德色克秉德別有傳

色克累官同知哈斯罕節度使事大定初除刑部侍郎充都統與副統完顏布呼自東京先赴中都輒署置官吏私用官中財物世宗至中都事覺色克當死布呼當除名詔寬減色克除名布呼削兩階解職二年起為大宗正丞除祁州刺史坐贓枉法當死詔杖一百五十除

名遣左衛將軍瓜爾佳扎拉諭之曰卿何面月至鄉中
與宗族相見今徙鄜州以家人自隨俟汝身死聽家人
從便久之起同知興中尹遷唐古部族節度使歷開遠
順義軍色克前在雲內受贓御史臺劾奏上謂宰臣曰
色克今三犯矣蓋其資質鄙惡如此令強幹吏鞫之獄
成法當死上曰色克祖父秦王宗翰有大功特免死杖
一百五十除名久之復起為勸農副使

贊曰宗翰內能謀國外能謀敵決策制勝有古名將之

風臨潢旣捷諸將皆有怠忽之心而請伐不已越千里以襲遼王諸將皆有畏顧之心而請期不已觀其欲置江淮專事陝服當時無有能識其意者甫釋干戈斂衽歸朝以定熙宗之位精誠之發孰可掩哉

宗望本名幹喇布又作幹里雅布太祖次子也每從太祖征伐常在左右都統杲已克中都宗翰在北安州獲遼護衛實訥埒知遼主在鴛鴦灤宗翰請襲之杲出青嶺遼兵三百餘掠降人家貲宗望曰若生致此輩可審

得遼主所在虛實遂與宗弼率百騎進騎多罷乏獨與馬和尚逐頁魯布呼伊勒希等留一騎趣後軍即馳擊敗之生擒五人因審遼主尚在鴛鴦灤未去無疑也於是進兵宗翰倍道兼行追遼主于五院司不及羅索等追之至白水灤遼主走陰山遼秦晉國王聶呼自立于燕京新降州部人心不固杲使宗望請太祖臨軍宗望至京師百官入賀上曰宗望與十餘騎經涉兵寇數千里可嘉也上宴羣臣歡甚宗望奏曰今雲中新定諸路

遼兵尚數萬遼主尚在陰山天德之間而聶呼自立于燕京新降之民其心未固是以諸將望陛下幸軍中也上曰懸軍遠伐授以成算豈能盡合機事朕以六月朔啓行既次大灤西南杲使希尹奏請徙西南招討司諸部于內地上顧謂羣臣曰徙諸部人當出何路宗望對曰中京殘敝芻糧不給由上京為宜然新降之人遽爾騷動未降者必皆疑懼勞師害人所失多矣上京謂臨潢府也上迺下其議命軍帥度宜行之上聞遼主在大

魚濼自將精兵萬人襲之普嘉努宗望率兵四千為前鋒晝夜兼行馬多乏追及遼主于石輦驛軍士至者才千人遼軍餘二萬五千方治營壘普嘉努與諸將議伊都曰我軍未集人馬疲劇未可戰宗望曰今追及遼主而不亟戰日入而遯則無及遂戰短兵接遼兵圍之數重士皆殊死戰遼主謂宗望兵少必敗遂與嬪御皆自高阜下平地觀戰伊都示諸將曰此遼主麾蓋也若萃而薄之可以得志騎兵馳赴之遼主望見大驚即遯去

遼兵遂潰宗望等還上曰遼主去不遠亟追之宗望以

騎兵千餘追之普嘉努為後繼太祖已定燕京韓魯為

都統宗望副之襲遼主于陰山青塚之間宗望洛索尼

楚赫以三千軍分路襲之將至青塚遇泥濘衆不能進

宗望與當堪四騎以繩繫遼都統林牙達實使為鄉導

直至遼主營時遼主往應州其嬪御諸女見敵兵奄至

驚駭欲奔命騎下執之有項後軍至遼太叔呼拉哈妃

國王聶呼次妃遼漢夫人并其子秦王許王女古裕伊

林幹里延大額頁次額頁趙王妃幹里延招討達魯詳
袞祿錦節度使伯特徹格爾皆降凡得車萬餘乘惟寧
王哈里及其長女乘軍亂亡去洛索尼楚赫獲其左右
輿帳進至索勒敏為書以招遼主遼主自金城來知其
族屬皆見俘率兵五千餘決戰宗望以千兵擊敗之遼
主相去百步遯去獲其子趙王實訥埒及傳國璽追二
十餘里盡得其從馬而卓哩特默哈布爾布達別獲牧
馬萬四千匹車八千乘及獻傳國璽于行在太祖曰此

羣臣之功也遂寘璽于懷中東面恭謝天地乃大錄諸帥功加賞焉遼主乃使穆隆阿持兔鈕金印請降宗望受之視其文乃元帥燕國王之印也宗望復以書招之諭以石晉北遷事遂使使諭夏國示以和好所以沮疑其救遼之心也宗望趨天德遼耶律慎思降及候人烏舍回皆言夏國迎護遼主渡大河矣宗望乃傳檄夏國曰果欲附我當如前諭執送遼主若猶疑貳恐有後悔及遼秦王等以俘見太祖太祖嘉宗望功乃以遼蜀國

公主伊林賜之棟摩與張覺戰大敗於兔耳山上使宗望問狀就以棟摩軍討張覺降瀕海郡縣遂與覺戰于南京城東覺敗宵遯奔宋語在覺傳城中人執覺父及其二子來獻宗望殺之使以詔書宣諭城中張敦固等出降使使與敦固俱入城收兵仗城中人殺使者立敦固為都統劫府庫括居民乘城拒守太宗賞破張覺功及有功將士各有差初張覺奔宋入于燕京宗望責宋人納叛人且徵軍糧久不聞問宗望欲移書督之請空

名宣頭千道增信牌安撫新降之民詔以新附長吏職員仍舊已命諸路轉輸軍糧勿督于宋給銀牌十空名宣頭五十道及遷潤來隰四州人徙于瀋州者俟畢農各復其業乃詔咸州輸粟宗望軍張敦固以兵八千分四隊出戰大敗宗望再三開諭敦固等曰屢嘗拒戰不敢遽降宗望許其望闕遥拜敦固乃開其一門宗望使棟摩奏其事乃下詔赦南京官民大小罪皆釋之官職如舊別敕有司輕徭賦勸稼穡疆場之事一決於宗望

又曰議索張覺及逋亡戶口於宋聞比歲不登若如舊
徵斂恐民匱乏度其糧數賦之射糧軍願為民者使復
田里小大之事關白軍帥無得專達朝廷詔宗望曰選
勲賢及有民望者為南京留守及諸闕員仍具姓名官
階以聞是時遷潤來隰四州之民保山砦者甚衆宗望
乞選良吏招撫上從之上召宗望赴闕而棟摩克南京
兵執偽都統張敦固殺之南京平赴京師於是宗翰請
無割山西地與宋幹魯亦言之棟摩論奏宋渝盟有驗

不可不備及宗望還軍上曰徵歲幣于宋以銀二十萬兩絹三十萬匹分賜爾軍及六部東京諸軍宗望至軍宋兵三千自海道來破九寨殺馬城縣戍將節度使圖爾噶取其銀牌兵仗及馬而去宗望索戶口宋人弗遣且聞童貫郭藥師治軍燕山宗望奏請伐宋曰苟不先之恐為後患宗翰亦以為言故伐宋之策宗望實啓之宗望為南京路都統棟摩副之自燕山路伐宋宗望奏曰棟摩於臣為叔父請以棟摩為都統臣監戰事上從

之以宗望監棟摩劉彥宗兩軍戰事宗望至三河破郭

藥師兵四萬五千于白河布希敗宋兵三千于古北口

郭藥師降遂取燕山府盡收其軍實馬萬匹甲冑五萬

兵七萬州縣悉平宋中山戍將王彥劉璧率兵二千來

降芬徹勝額以三百騎遇中山三萬人于阨隘之地力

戰死之珠爾蘇呼爾哈軍繼至殺二萬餘人宗望破宋

真定兵五千人遂克信德府次邯鄲宋李鄴請修舊好

宗望留軍中不遣自郭藥師降益知宋之虛實宗望請

以為燕京留守及董才降益知宋之地理宗望請任以軍事太宗俱賜姓完顏氏皆給以金牌四年正月己巳諸軍渡河取滑州使吳孝民入汴以詔書問納平州張覺事令執送童貫譚稹詹度以黃河為界納質奉貢癸酉諸軍圍汴宋少帝請為伯姪國効質納地增歲幣請和遂割太原中山河間三鎮書用伯姪禮以康王構太宰張邦昌為質沈晦以誓書三鎮地圖至軍中歲幣割地一依定約語在宋事中二月丁酉朔與宋平退軍孟

陽是夜姚平仲兵四十萬來襲候騎覺之分遣諸將迎擊大破平仲軍復進攻汴城問舉兵之狀少帝大恐使宇文虛中來辨曰初不知其事且將加罪其人宗望輟弗攻改肅王樞為質康王構遣歸師還河北兩鎮不下遂分兵討之宗望罷常勝軍給還燕人田業命將士分屯安肅雄霸廣信之境宗望還山西未幾為右副元帥有功將士還賞有差頃之宋少帝以書誘伊都蕭仲恭獻其書詔復伐宋八月宗望會諸將發自保州耶律鐸

破敵兵三萬于雄州殺萬餘人納延敗宋軍七千於中山高陸董才破宋兵三千於廣信宋种師閔軍四萬人駐井陘宗望大破之遂取天威軍東還遂克真定執知府李邈得戶三萬降五縣遂自真定趨汴十一月戊辰宗望至河上降魏縣諸軍渡河留諸將分出大名之境降臨河縣至大名縣德清軍開德府皆克之阿里庫以騎兵三千先趨汴破宋軍六千于路取胙城抵汴城下覆宋兵千人擒數將宗望至汴分遣諸將遏宋援兵殲

都納延薩喇達實連破宋援兵閏月壬辰朔宋兵一萬
自汴城來戰宗望選勁勇五千使當堪呼魯楚古爾蘇
擊敗之癸巳宗翰自太原會軍于汴丙辰克汴州辛酉
宋少帝詣軍前十二月癸亥宋帝奉表降上使勗就軍
中勞賜宗翰宗望使皆執其手以勞之四月以宋二主
及其宗族四百七十餘人及珪璋寶印袞冕車輅祭器
大樂靈臺圖書與大軍北還宗望乃分諸將鎮守河北
董才降廣信軍及旁近縣鎮宗望乃西上涼陘詔宗望

曰自河之北今旣分畫重念其民見城邑有被殘者遂阻命堅守其申諭招輯安全之儻堅執不移自當致討若諸軍敢利于俘掠輒肆毀蕩者當抵于罰是月宗望薨天會十三年封魏王皇統三年進許國王又徙封晉國王天德二年贈太師加遼燕國王配享太宗廟廷正隆二年例降封大定三年改封宋王諡桓肅子齊文京初遼帝之奔陰山也遼節度使華善與林牙瑪格男慎思俱被擒都統杲使阿林護送德勒岱華善伊勒希等

入京師德勒岱道亡太祖誅阿林華善弟道溫為興中
尹太祖使滿都布以兵千人與華善往招之華善欲亡
去不克至興中城下以矢繫書射城中教道溫毋降事
泄滿都布責之曰汝何反覆如此對曰以忠報國何反
覆之有雖死不恨乃殺之既而宗望軍遇遼都統伯特
等道溫在其中相與隔水而語宗望承制招之伯特唯
諾無降意宗望謂道溫曰汝兄和尚因戰而獲未嘗加
罪後以叛誅能無痛悼道溫曰吾兄辱於見獲榮於死

國宗望顧馬華善曰能為我取此乎對曰能遂以所部渡水擊敗其衆直趨道溫射中其臂獲而殺之

齊本名舒蘇長身美髯天眷三年以宗室子授鎮國上將軍皇統元年遷光祿大夫正隆六年遷銀青榮祿大夫大定初遷特進加安武軍節度使留京師奉朝請齊以近屬上所寵遇而性庸滯無材能大定三年罷節度官給隨朝三品俸累官特進卒弟文弟京皆以謀反誅世宗盡以其家財產與齊之子耀珠詔齊妻曰汝等皆

當緣坐有至大辟及流竄者朕念宋王故置而不問且以其家產賜汝子宜悉朕意十五年上召英王爽謂曰卿於諸公主女子中為耀珠擇婚其禮幣命有司給之俄襲叔父京山東西路特默齊明安

文本名呼喇皇統間授世襲穆昆加奉國上將軍居中京海陵篡立賜錢二萬貫是時左淵為中京轉運使市中有穢術強謙者文與淵皆與之游海陵還中京聞之召強謙詰問窮竟本末既而殺之于市責讓文淵貞元

元年除秘書坐與靈壽縣主阿里庫有姦杖二百除名
俄復秘書監封王正隆例封鄖國公以喪去官起復翰
林學士承旨同判大宗正事昌武軍節度使大定初改
武定軍留京師奉朝請三年賜上常御綵服佩刀而遣
之謂文曰朕無兄弟見卿往外郡惻然傷懷卿頗自放
宜加檢束除廣寧尹召為判大宗正事封英王是時弟
京得罪上謂文曰朕待京不薄乃包藏禍心圖不軌不
忍刑及骨肉遂從輕典卿亦驕縱無度宋王有社稷功

武靈封太祖諸孫為王卿獨不封朕即位封卿兄弟為王自今懲咎悔過赤心事朕無患朕不知也除真定尹賜以衣帶改大名尹徙封荆王文到大名多取明安穆昆良馬或以駕馬易之買民物與價不盡其直尋常占役弓手四十餘人詭納稅草十六萬束公用闕取民錢一萬九千餘貫坐是奪爵降德州防禦使僚佐皆坐不矯正解職監察御史董師中按文事失糾察已除尚書省都事降沁南軍節度副使詔曰自今長官不法僚佐

不矯正又不言上並嚴行懲斷文既失職居常怏怏日與家奴舒穆魯和卓和爾察為怨言和卓揣知其意因言南京路明安阿古和卓穆昆伯哩尼楚赫與大王厚善果欲舉大事彼皆願從文信其言乃召日者康洪占休咎密以謀告洪洪言來歲甚吉文厚謝洪使家僮綱格等往南京以書幣遺阿古等綱格問和卓何以知阿古等必從和卓曰阿古等與大王善以此意其必從耳綱格到南京見阿古等不言其本來之事及還給文曰

阿古從大王矣文乃造兵仗使家奴幹爾達畫陣圖家
奴重喜詣河北東路上變府遣總管判官伯特馳往德
州捕文伯特至德州日已晚會文出獵召防禦判官綽
鄂謀就獵所執之綽鄂言文兵衛甚衆且暮夜明日文
生日可就會上執之伯特乃止是夜文知本府使至意
其事覺乃與和卓和爾察等俱亡去河間府使奏文事
詔遣右司郎中赫舍哩扎克丹翰林修撰阿布哈額哩
頁往德州鞠問上聞文亡命謂宰臣曰海陵翦滅宗室

殆盡朕念太祖孫存者無幾人曲為寬假而文曾不知
幸尚懷異圖何狂悖如此上恐文久不獲註誤者多督
所在捕之詔募獲文者遷官五階賜錢三千貫文以大
定十二年九月事覺亡命凡四月至十二月被獲伏誅
康洪論死餘皆坐如律詔釋其妻珠爾蘇埒伯特綽鄂
不即捕致文亡去伯特杖二百除名綽鄂杖一百削兩
階詔曰德州防禦使文北京曹貴鄜州李方皆因術士
妄談祿命陷于大戮凡術士多務苟得肆為異說自今

宗室宗女有屬籍者及官職三品者除占問嫁娶修造
葬事不得推筭相命違者徒二年重者從重上以文家
財產賜其故兄特進齊之子耀珠并以西京留守沒入
家產賜之

京本名呼魯以宗宗子累遷特進天德二年除翰林學
士承旨兼修國史加開府儀同三司遷工部尚書改禮
部兵部判大宗正事封曹王除河間尹正隆二年例封
瀋國公北京留守以喪去官起復益都尹六年坐違制

立春日與圖克坦貞飲酒降灤州刺史俄改絳陽軍節
度使海陵遣護衛呼嚕往絳州殺之京由間道走入汾
州境得免世宗即位來見于桃花塢復判太宗正事封
壽王二年正月戊辰朔日食伐鼓用幣上不視朝減膳
撤樂詔京代拜行禮世宗懲創海陵疎忌宗室加禮京
兄弟情若同生謂京等曰朕每見天象變異輒思政事
之闕寤寐自責不遑凡事必審思而後行猶懼獨見未
能盡善每令羣臣集議庶幾無過舉也是時伐宋未罷

兵用度不足百官未給全俸京家人數百口財用少上聞之賜金一百五十兩重綵百端絹五百匹改京京留守賜佩刀廐馬京到西京京妻嘗召日者孫邦榮推京祿命邦榮言留守官至太師爵封王京問此上更無否邦榮曰止於此京曰若止於此所官何為邦榮察其意乃詐為圖識作詩中有呼嚕為之語以獻於京京曰後誠如此乎遂受其詩再使卜之邦榮稱所得卦有獨權之兆京復使邦榮推世宗當生年月家人孫小哥妄作

謠言誑惑京如邦榮指京信之京妻公壽具知其事大
定五年三月孫邦榮上變詔刑部侍郎高德基戶部員
外郎完顏烏肯徹往鞠之京等皆款伏獄成還奏上曰
海陵無道使光英在朕亦保全之况京等哉於是京夫
婦特免死杖一百除名嵐州樓煩縣安置以奴婢百口
自隨官給上田遣烏肯徹劉琬宣諭京詔曰朕與汝皆
太祖之孫海陵失道翦滅宗支朕念兄弟無幾於汝尤
為親愛汝亦自知之何為而懷此心朕念骨肉不忍盡

法汝若尚不思過朕雖不加誅天地豈能容汝也十年
四月詔于樓煩縣為京作第一區月給節度廩俸十二
年兄德州防禦使文謀反上問皇太子趙王永中及宰
臣曰京謀不軌朕特免死今復當緣坐如何宰臣或言
京圖逆今不除之恐為後患上曰天下大器歸於有德
海陵失道朕乃得之但務修德餘何足慮太子曰誠如
聖訓乃遣使宣諭京詔曰卿兄文舊封國公不任職事
朕進封王爵委以大藩頃在大名以賊得罪止削左遷

不知恩幸乃蓄怨心謀不軌罪及兄弟朕念宋王皆免
緣坐文之家產應沒入者盡與卿兄子耀珠卿宜悉此
意二十年十一月上問宰臣曰京之罪始於其妻妾卜
休咎太祖諸孫存者無幾朕欲召置左右不使任職但
廩給之卿等以為何如皆曰置之近密臣等以為非宜
上曰朕若修德何必豫懷疑忌久之上復欲召京宰臣
曰京不赦之罪也赦之已為至幸矣豈可復上默良久
乃止

贊曰宗望啟行平州戰勝白河席卷而南風行電舉兵
無留難再閱月而汴京圍矣所謂敵不能與校者耶既
取信德留兵守之以為後距此豈輕者耶管子曰徑於
絕地攻於恃固獨出獨入而莫之能止其宗望之謂乎

金史卷七十四